



NEW ZEALAND **QUALIFICATIONS** AUTHORITY
MANA TOHU MĀTAURANGA O AOTEAROA

QUALIFY FOR THE FUTURE WORLD
KIA NOHO TAKATŪ KI TŌ ĀMUA AO!

Te Pūrongo Aromātai me te Arotake ā-Waho

Te Wānanga Takiura o Ngā Kura
Kaupapa Māori o Aotearoa

Te rā tuku i te rīpoata: 19 Ākuhata 2026

He Mihi

*Ko te aroha te pou,
poupoua kia mau.
Ko te aroha te pou,
tiritiria kia ū.
Kia mau, kia ū
te pou o te aroha
ki roto i tēnei whānau
Whakamaua kia tina!
Haumi e, hui e, tāiki e!*

Ko tēnei te reo tātaki, te reo e mihi atu ana ki a koutou e ngā kaiāpai o Te Wānanga Takiura o Ngā Kura Kaupapa o Aotearoa mai i Te Rōpū Arotake o te Mana Tohu Mātauranga o Aotearoa, i arotakengia ā koutou mahi i te marama o Hepetema 2025. I roto i ēnei tirohanga ā mātou i kitea ngā uaratanga o te manaaki, o te ngākaunui, o te ngohengohe, o te atawhai o te tū kaha, o te māia me te matapopore.

Ko ā koutou mahi e tautoko kaha ana i ngā tauira puta noa i te motu, i te ao whānui anō hoki kia whakahokia mai tō rātou reo Māori mai i te mata o te ngaro ki te mata o te arero, ki te whatu o te manawa, ki te hihiri o te mahara. I rangona e mātou te mamae o te nui aroha o ngā tauira, o ngā kaiako ki tō rātou reo rangatira. Koinei te take i tiritiria te pou o te aroha kia ū.

Whai iho i te arotake, i puta e rua ngā toronga aroturuki nā NZQA. Ka mutu, e rua ngā amuamu ākongā i tāpaehia atu ki NZQA ka kipa ake i tētahi ketuketunga ā-roto nā Te Wānanga Takiura anō i hāpai, ā, i muri mai nā NZQA i whakakoia. E rima ngā hohenga i puta mai i te ketuketunga e koke nei, ā, ka mihia tērā e NZQA. Ko te putanga o tā NZQA ketuketū me tā Te Wānanga Takiura, he whakaaweawe i te pāpātanga o tēnei arotake EER. Mā ngā whakawhanaketanga nei ka whakapakari i te kokenga o te whare.

E kore ēnei whakawhanaketanga e whakakauriki i te nui o ngā oha kua puta mai mō ngā iwi-hapū, mō ngā whānau, mō ngā marae me ngā hāpori o Aotearoa whānui, ā haere ake nei. He hōnore nui tēnei mō mātou katoa o te rōpū arotake ki te whai wāhi atu ki a koutou i tēnei arotekenga.

He kupu whakataki

Nō te tau 1997 Te Wānanga Takiura o Ngā Kura Kaupapa Māori o Aotearoa (Te Wānanga Takiura) i whakatūria ai e Tuki Nepe, te tuhi mareikura o Te Tairāwhiti, o Ngāpuhi anō hoki. I taua wā tonu, i raro Te Wānanga Takiura i te mana whakahaere (ā-ture, ā-putea hoki) i te Kāreti Whakangungu Kaiako o Epsom. Nō muri tata mai i te matenga o Tuki i te tau 1998, i tonoa a Tawhirimatea rāua ko Kaa Williams kia noho hei kaiārahi o Te Wānanga Takiura. I taua wā anō, i motukia te taura tāngaengae ki te Kāreti o Epsom, anō nei e rewa ana ki te pae. Kua tata te toru tekau tau, kua toka.

E hao nei e tēnei reanga, te toi huarewa tipuna. Mō te hunga kore reo tēnei wānanga. Mō te hunga kore tikanga tēnei wānanga. Mō te hunga kore mōhio ki tōna ao Māori tēnei wānanga. Mō te hunga haikai ki te reo Māori tēnei wānanga.

Ko te kaupapa rangatira o Te Wānanga Takiura he whakangungu kaiako kia whakakāhahu Māori ai i te whakaaro o ngā tamariki ki te reo Māori. Heoi, me Māori te arero, me Māori te ao, me Māori te whakaaro o ngā tauira. Ko te Reo Rumaki tērā e kaha tautoko ana i te mahi a te tangata kia tū rangatira ai i tōna reo Māori, i tōna ao Māori. Ko ngā kōrero e whai ake nei e hāngai pū ana ki tēnei o ngā hōtaka ako o Te Wānanga Takirua, ko te Reo Rumaki.

Te whare ako:	Te Wānanga Takiura o Ngā Kura Kaupapa Māori o Aotearoa
Te momo:	Private Training Establishment
Te wāhi:	120 Asquith Avenue Mount Albert Auckland 1025
Kaihaina Rārangi tikanga atawhai (mō ngā ākonga nō te ao whānui):	Āe
Ngā ākonga:	231 ngā tauira.
Ngā kaimahi:	17 ngā ringa marae (2 he hāmanga) 4 ngā ringa otaota
Ngā āhuatanga o te whare ako:	Ko te whakapono matua o Te Wānanga Takiura, ko te reo Māori anake e āhei ana ki te whakaoho i te whatumanawa, i te ngākau, i te wairua o te tauira. Nō reira, me kōunga, me kairangi, me Māori ngā mahi katoa o Te Wānanga Takiura. Ko te katoa o ngā mahi te wānanga nei, mahi whakaako mai, mahi whakahaere mai, ka kawea ki te reo Māori.

Ngā hua o mua:	Pounamu Kahurangi – Ngā hua o te whare ako Pounamu Kahurangi – Ngā whakairinga kōrero
Ngā kaupapa ka arotahitia:	Te Pōkairua Reo Māori (Kaupae 5)
Tau MoE:	8425
Tohu NZQA:	C54933
Te rā i tae atu ai te EER:	11-12 o Hepetema 2025

Ngā Whakatau

Ko te reo Māori me ōna tikanga, ko te tirohanga Māori te tūāpapa o ngā whakahaerenga katoa o Te Wānanga Takiura. Ko ōna hua, he maha. Ka huritao ngā kaiako i ā rātou mahi katoa. Karekau he āputa maha, he mea iti noa.

Pounamu Whakairo – Ngā hua o te whare ako

Kotahi anake te whāinga matua o Te Wānanga Takiura: he whakatō i te reo Māori, i te whakaaro Māori ki roto i ia tauira e kuhu mai rā i ōna tataua kia tū rangatira ai mō tōna whānau, mō tōna hapū, mō tōna iwi. Kua whakatōngia ēnei koronga i ngā peka katoa o Te Wānanga Takiura, kaimahi mai, tauira mai, poari mai.

Pounamu Whakairo – Ngā whakairinga kōrero

He hōtaka ako pai tō te Reo Rumaki e kaha tautoko ana i ngā hiahia o ngā tauira. Hui ai ngā kaiako kia mārama pū ai rātou ki ngā āhuatanga katoa o te marautanga. Ko ngā āhuatanga ako, he ihi, he wehi e wana ake ai ngā tauira. Ka aromatawaitia te tauira, ka aromatawaitia anō hoki te kaiako. Ka arotake ngā kaiako i te taumata o ngā māka, kia tika ai te aro matawai, ngā paearu anō hoki.

Ka mōhio ia kaiako ki āna tauira katoa. Ki te puta mai he raru ā-ako, ā-hauā, ā-whānau, aha atu, aha atu ka tere whakatikahia, ka whakaritea rānei he rautaki kia pai ai.

Huritao ai Te Wānanga Takiura i āna mahi katoa. Ka whakapuakina e ngā tauira, e ngā kaiako, e ngā hunga whaipānga ō rātou whakaaro, kua tuhia ki te rae, ā, ka āta wānangahia kia pakari ai. Ka tukuna ērā kōrero me ngā panonitanga ki te Poari. E kore e noho muna.

Mārakerake ana te kite i ngā taukaea i waenganui i ngā tauira, i ngā kaiako, i ngā kaiwhakahaere, i ngā mema o te Poari, i ngā tauira o mua hoki. Ka ora rawa atu te whanaungatanga. Ko te hua, ka eke te tauira ki te taumata tiketike.

He kanohi kitea te whānau whānui o Te Wānanga Takiura i ngā kaupapa huhua i Tāmaki-makau-rau, i rohe kē anō hoki. Ko tōna koha ki te ao, he tohunga ki te whakairo kupu, he tohunga ki te manaaki. Ki te puta ana te ihu o ngā tauira o Te Wānanga Takiura, ka mōhiotia whānuitia tōna momo. He pūkenga ōna e hiahia ana e ngā hāpori whānui, e ngā whānau hoki.

I whakatōngia te hōtaka o te Rumaki Reo hei kaupapa whakatipu i te reo Māori, i ngā tikanga Māori, i ngā mātauranga Māori mā te rumaki i ngā tauira i ngā akoranga katoa mā te reo Māori. Kua ea tērā moemoeā. Heoi, he kahikatea anō ka taea.

Ngā putanga whai muri i te EER (11-12 o Hepetema 2025)

E mihia ana e NZQA tā Te Wānanga Takiura kōkiri kia whai rongoā mō ngā take i puta mai i ngā amuamu tauira me te tono kia tū arotake tūhake, me te tuku i ngā putanga me te rongoa hoki ki NZQA. E manawa nei a NZQA i tā Te Wānanga Takiura ū ki ana kaupapahere, ki ana hātepe, ana tikanga hoki, me tana aroturuki tonu, aromātai hoki i te kawē i ēnei whakawhanaketanga

I tautohua e ngā nawe tauira e rua he wāhanga me rite tonu te whakamahi ki ngā kaupapahere me ngā hātepe a te whareako. Ahakoa ngā kaupapahere tika i whakatauhia, kei reira tonu ētahi kōwhiringa kia whakakaha ake i te whakamahinga e tika ai te whakahaerenga. E hāngai ana ngā kūrururu i puta mai ki ngā nawe mō ngā tukanga, ngā hātepe hoki me tā te tauira uru atu ki āna mōhiohio whaiaro me āna mōhiohio mātauranga. Kua hirahiratia e ēnei take ngā āputa kia whakatikahia, me te pāpātanga ki te whakapono ki te whakaputa mātauranga a te whareako, me ana tikanga hurihuri whaiaro.

Ka tohua e NZQA ngā pūrongo aroturuki tohu paetahi 2025 e rua, ka tāmura mahia te matea kia whakapakarihia e Te Wānanga Takiura te pūnaha aromātai tauira mō te whiwhi whakahokinga tauira me te whakautu atu i te wā tika. Ka mihia e NZQA te koke o ēnei whakawhanaketanga. Ka tari atu e NZQA kia kite i te pāpātanga me te kawē hoki o ēnei whakareinga taro kau iho.

Ngā Hua

1.1 Ka pēhea tā koutou whakapuaki i te kaupapa, ā, ka pēhea koutou e mōhio ai e whakatutukihia ana?

Ngā hua o te Whare Ako:	He Pounamu Kahurangi
Ngā Whakairinga Kōrero:	He Pounamu Kahurangi
Ngā Kitenga:	I whakatūria Te Wānanga Takiura o ngā Kura Kaupapa Māori o Aotearoa kia rahi ai ngā kaiako kura kaupapa Māori. E rua noa iho ngā wānanga o Aotearoa whānui e whakaako ana i te tohu kaiako. Me pēhea e tutuki ai ki te kore he reo ō te tangata ngākaunui ki te whai i tēnei huarahi ako. Anā! Ko te Rumaki Reo. Nō reira, ko te tauira i tīmata ai i te Rumaki Reo, ka puta i Te Tohu Paetahi Ako, he tino taonga. Ka tae atu ngā tauira ki Te Wānanga Takiura, kua patua rātou e te whakamā i te kore mōhio ki tō rātou reo. Nāwai rā, ka puta te ihu o ngā tauira Rumaki Reo me te arero Māori, te ngākau Māori me te tirohanga Māori. Ka hoki atu ki ō rātou ake kāinga, hāpori, iwi rānei hei hōia e ārahi ana i ngā kaupapa huhua. Hei tauira, ko te noho ki te paepae, ko te whakahaere kaupapa/wānanga mō te whānau/hapū, ko te whakarite rautaki reo/tikanga, ko te whāngai tamariki ki te reo Māori. E kore e motuhia te taukaea o ngā tauira o mua ki tō rātou wānanga. Hokihoki tonu mai ngā ihu puta ki te tautoko i ngā kaupapa o Te Wānanga Takiura. He tohu o te nui aroha. He nui rawa te manaakitanga o ngā kaiako ki ngā tauira. Ki ētahi tauira he kāinga rua, ki ētahi atu he kāinga tahi. E hia kē mai nei ngā wā i whakapuakina mai e ngā tauira, he āhuru mōwai te wānanga nei. Hei tauira, ko ngā whakahaerenga Māori hei tiaki i te wairua o te tangata (karakia), ko te ngāwari, ko te ngākau mahaki o te kaiako, ko te whāngai ā-hinengaro, ā-wairua hoki i ngā tauira. Katoa ēnei ritenga e manaaki ana i te mana me te tapu o ngā tauira kia eke panuku ai, ka mutu, o ngā kaiako hoki. Ka tino mōhio ngā kaiako katoa ki ā rātou tauira. He kaha nō te whakawhanaungatanga i te tīmatanga o te tau. Nā whai anō i mōhio pū ai ngā kaiako ki ngā hiahia a ngā tauira, i ō rātou pūkengatanga, i ō ratou ngoikoretanga anō hoki. Kua whakaritea e ngā kaiwhakahaere me ngā kaiako kia hui tahi ai

	ia ata ki te whakangungu i a rātou anō, ki te whakakoi i ō rātou pukenga ako, ki te wānanga i ngā mahere ako e tika ana mō ia tauira. Kāore ngā tauira i te whakamā ki te tuku i ō rātou whakaaro, i ō rātou nawe, i ō rātou amuamu ki ngā kaiako. Ka mōhio rātou ka ngana ngā kaiako rātou ko ngā kaiwhakahaere ki te whakatika i ngā hē. Heoi, me whakamōhio atu ki a rātou mēnā kua ea, kāore rānei, he aha hoki i kore ai e ea. E wero pai ana te marau i ngā tauira. E ai ki tētahi tauira – <i>mā te hapa e ako, mā ngā wero ka ako, ka tipu, ka angitu, ka whanake</i>. Ehara i te marau ōkawa o te akomanga anake tēnei e kōrero nei, heoi ko te ‘marau’ o Te Wānanga Takiura. Ko te karakia tērā, ko te karanga tērā, ko te kōrero ōkawa tērā, ko te waiata/haka tērā. Ahakoa te wiriwiri o ngā pona i te tīmatanga o te tau, ka waia haere ngā tauira ki ēnei momo tūāhuatanga. Hei tauira, ka tīmata ki te tuku kōrero i mua i te karaehe i te wiki tuarua o te Rumaki Reo, nāwai, nāwai, ka tū i mua i te katoa o te wānanga ki te karanga, ki te tuku mihi ō-kawa, ki te pao hoki. He maramara keke. Ka ārahina pai te wānanga nei. Maruwehi ana te tini me te mano i ngā Kaihautū o Te Wānanga Takiura. Me uaua kē ka kitea te hunga kaumātua pēnei i te tokorua nei e whakahaere tonu ana i tētahi wānanga. Tino kore nei. He roa rawa ngā hiku o ēnei taniwha. E rua ngā Kāhui Tautoko; ko te Poari Mana Urungi¹ ko te Poari Mana Mātauranga.² He wheako, he mōhiotanga, he pūkenga rerekē ō ia mema o ēnei kāhui. Waihoki, ka pū te ruha, ka hao te rangatahi me ō rātou whakaaro hou, mōhiotanga hoki o tēnei ao hurihuri. Tū ai ngā hui ā-poari i ia marama, i ia marama. Ka tukuna e ngā Kaihautū he ripoata o ngā mahinga katoa o Te Wānanga Takiura hei pānuitanga mā rātou. Ko ngā mea pai, ko ngā mea kāore i te pai, ko ngā panonitanga me ngā taunakitanga he aha i pērā ai kia pai ai te ketuketu a ngā Poari. Kāhore he mea e huna ana. Ko tā ngā poari nei, he matapae i ngā tūraru e pā nei pea ki Te Wānanga Takiura. Ko te Kāwanatanga tērā, ko te whare tērā, ko te putea tērā, ko te aha atu anō. Matapakihia ai e ngā poari ēnei momo take ki te whakarite rautaki hei kaupare i ngā
--	---

¹ Governance Board

² Academic Board

	whiunga o te wā kia kore ai te mana o Te Wānanga Takiura e takahia e rāwaho mā. Kei te anga whakamua ngā kaihautū, ngā kaiwhakahaere, me ngā poari hoki. Ko rātou tonu ngā kaitiaki o te kaupapa, ā, me tiaki e rātou mō ngā uri ā muri ake nei. Ka kitea he raru, he āputa, he panonitanga, tēnā, ka wānanga, ka whakarite rautaki, ka kōkiri. Mō te wā roa, i te whakatipu Te Wānanga Takiura i tō rātou ake pā kaiako. Ko te katoa o ngā kaiako, he tauira o mua o Te Wānanga Takiura. Nā tō rātou tautōhito ki te Rumaki Reo, i karangatia rātou kia tū hei kaiako. Kei te ora rawa atu tēnei pā.
--	--

Ko te kaupapa ka arotahitia

Kei tēnei wāhanga o te rīpoata ngā kōrero motuhake anō kāore i tuhia i te wāhanga tuatahi.

1.2 Te Pōkairua Reo Māori (Kaupae 5)

Ngā hua o te Whare Ako:	He Pounamu Kahurangi
Ngā Whakairinga Kōrero:	He Pounamu Kahurangi
Ngā Kitenga:	- I ia tau, i ia tau, ka rahi ake te nama o ngā tauira e hiahia ana ki te kuhu ki roto i ngā kuaha o Te Wānanga Takiura hei tauira. Nō ngā tōpito katoa o te motu, tae atu anō hoki ki Ahitereiria, ki whenua kē anō hoki (he Māori tonu). Ko ētahi he ihuhupe, ko ētahi e whakatā ana i te mahi mō te tau, ko ētahi he kaumātua, ko ētahi he mātua hou. He rerekē te take i hou mai ai rātou katoa. Engari, kotahi te whāinga matua, kia whakahokia mai te reo me ōna tikanga ki tō rātou ao. Kounga rawa te arero Māori o ngā tauira o Rumaki Reo. - Neke atu i te 90 ōrau o ngā tauira i eke ai ki te karamatamata o angitu i ia tau mō ngā tau e toru kua hipa ake nei. Hei tā ngā tauira, kāore rātou i uru i te Rumaki Reo mō te tohu. Ko te reo te hua nui ki a rātou. - Ka puta ana te ihu o te tauira, ka whakaponono ia ki a ia anō. Ka karanga marika atu, 'Āe, he Māori ahau!' - Ka whāngaihia te ngākau, te hirikapo, te wairua o te tauira ki te reo Māori me ōna tikanga me ōna mātauranga. Ka manaakihia, ka tiakina e ngā kaiako, e ngā kaihautū hoki. - He āhuru mōwai Te Wānanga Takiura me ngā kaiako katoa o Rumaki Reo mō te ahi pūrēhua kia kongange ai anō.

Ngā Tūtohunga

Recommendations are not compulsory but their implementation may improve the quality and effectiveness of the training and education provided by the tertiary education organisation (TEO). They may be referred to in subsequent external evaluation and reviews (EERs) to gauge the effectiveness of the TEO's quality improvements over time.

Karekau he raruraru e ara ake ana i tēnei arotakenga kia whakatikahia.

Ngā Ture

Requirements relate to the TEO's statutory obligations under legislation that governs their operation. This include NZQA Rules and relevant regulations promulgated by other agencies.

1	Private Training Establishment Registration Rules 2025 Rule 6.1.4(i) - Information to students	Arotakehia ngā tukanga mō te uru atu ki ngā mauhanga whakauru, mauhanga mātauranga hoki, e āhei ai te tautukunga ki ngā kaupapahere whakahaere o ngā Ture PTE.
2	Private Training Establishment Registration Rules 2025 Rule 6.1.5(a) and (b) - Student interests	Arotakehia, whakahoungia hoki ngā kaupapahere me ngā tukanga tuku nawe e āhei ai te whakahaere tika i ngā nawe nā ngā ākonga o nāiane, o mua hoki, ā, he rite tonu, he mārama anō hoki, kīhai ki te ture i kīia atu.
3	Private Training Establishment Registration Rules 2025 Rule 6.1.4(e) - Information to students	Me mātua whakarite kia mārama ngā hātepe tuku nawe mō te tuku, te whakahaere, mō te kōkiri me te whakatau nawe, tae atu ki te uru ki ngā ratonga tuku nawe ā-waho pērā ki Study Complaints.
4	Private Training Establishment Registration Rules 2025 Rule 6.1.4(e) - Information to students	Whakahoungia ngā taipitopito whakapā pokapū, ā, me hāngai ngā kaupapahere, ngā hātepe, ngā mōhiohio tauira ki ngā whakahau o mohoa o te Code me te Ture PTE.

5	Education (Pastoral Care of Tertiary and International Learners) Code of Practice 2021 – Outcome 2: Learner Voice	Me hāngai hoki ki te Putanga 2 o te Code te whakahaere nawe, te tautāwhi tauira, me te uru ki te tukanga whai mōhiohio me te tukanga whakawhitiwhiti kōrero
---	---	---

Tāpiritanga

Conduct of external evaluation and review

All external evaluation and reviews are conducted in accordance with NZQA's published rules. The methodology used is described in the web document <https://www.nzqa.govt.nz/providers-partners/external-evaluation-and-review/>. The TEO has an opportunity to comment on the accuracy of this report, and any submissions received are fully considered by NZQA before finalising the report.

Disclaimer

The findings in this report have been reached by means of a standard evaluative process. They are based on a representative selection of focus areas, and a sample of supporting information provided by the TEO under review or independently accessed by NZQA. As such, the report's findings offer a guide to the relative quality of the TEO at the time of the EER, in the light of the known evidence, and the likelihood that this level of quality will continue.

For the same reason, these findings are always limited in scope. They are derived from selections and samples evaluated at a point in time. The supporting methodology is not designed to:

- *Identify organisational fraud³*
- *Provide comprehensive coverage of all programmes within a TEO, or of all relevant evidence sources*
- *Predict the outcome of other reviews of the same TEO which, by posing different questions or examining different information, could reasonably arrive at different conclusions.*

³ NZQA and the Tertiary Education Commission (TEC) comprehensively monitor risk in the tertiary education sector through a range of other mechanisms. When fraud, or any other serious risk factor, has been confirmed, corrective action is taken as a matter of urgency.

Regulatory basis for external evaluation and review

External evaluation and review is conducted under the Quality Assurance (including External Evaluation and Review (EER)) Rules 2016, which are made by NZQA under section 253(1)(pa) of the Education Act 1989 and approved by the NZQA Board and the Minister authorised as responsible for Part 20 of the Education Act.

Self-assessment and participation and cooperation in external evaluation and review are requirements for:

- maintaining accreditation to provide an approved programme for all TEOs other than universities, and*
- maintaining consent to assess against standards on the Directory of Assessment Standards for all TEOs including ITOs but excluding universities, and*
- maintaining training scheme approval for all TEOs other than universities.*

The requirements for participation and cooperation are set through the Programme Approval and Accreditation Rules 2018, the Consent to Assess Against Standards Rules 2011 and the Training Scheme Rules 2012 respectively. These rules were also made by NZQA under section 253 of the Education Act 1989 and approved by the NZQA Board and the Minister.

In addition, the Private Training Establishment Rules 2018 require registered private training establishments to undertake self-assessment and participate in external evaluation and review as a condition of maintaining registration. The Private Training Establishment Registration Rules 2018 are also made by NZQA under section 253 of the Education Act 1989 and approved by the NZQA Board and the Minister for Tertiary Education, Skills and Employment.

NZQA is responsible for ensuring non-university TEOs continue to comply with the rules after the initial granting of approval and accreditation of programmes, training schemes and consents to assess and registration. The New Zealand Vice-Chancellors' Committee (NZVCC) has statutory responsibility for compliance by universities.

This report reflects the findings and conclusions of the external evaluation and review process, conducted according to the Quality Assurance (including External Evaluation and Review (EER)) Rules 2016. The report identifies strengths and areas for improvement in terms of the organisation's educational performance and capability in self-assessment.

External evaluation and review reports are one contributing piece of information in determining future funding decisions where the organisation is a funded TEO subject to an investment plan agreed with the Tertiary Education Commission.

External evaluation and review reports are public information and are available from the NZQA website (www.nzqa.govt.nz). All rules cited above are available at <https://www.nzqa.govt.nz/about-us/our-role/legislation/nzqa-rules/>, while information about the conduct and methodology for external evaluation and review can be found at <https://www.nzqa.govt.nz/providers-partners/external-evaluation-and-review/>.

NZQA

Ph 0800 697 296

E qaadmin@nzqa.govt.nz

www.nzqa.govt.nz